



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 7

Opposition INDIA-i Coordination Committee ka tentetogo

Thai chubai taoba PM Thaksin temerenshi ajemtsüogo



VOL. XX NO. 321 (ADOK 321) DIMAPUR KÜPTOKNÜ (SATURDAY) RONGJUI (SEPTEMBER) 02, 2023 ₹ 5.00

## Nagaland Assembly-i UCC aser Forest Act anema ozüing latettsü KIN TELOKTEMI ULBS NUNG 33% WOMEN RESERVATION AGIZÜKER

**Kohima, September 1, 2023 (TYO):** Nagaland sorkari kin teloktem aser civil societies den külem senden ka amendang Assembly nung bangzüing ka renema Uniform Civil Code (UCC) aser Forest Conservation (Amendment) Act khenyongi magizüksü telemtetba agiogo.

Tanü senden nung Nagaland Municipal Act 2001 aser Urban Local Bodies elections onüktem benoka lemsatop.

Iba senden amenba sülen Secretariat Conference Hall nung osangbener den jembidang Power & Parliamentary Affairs Minister aser government spokesperson, K G Kenye-i "mapang tatsüka Nagaland nung iba onük ana ya khuret ka ama jembia aruogo aser sorkar o public tsüingda onük asem atema mangatetepi aruogo" ta ashi.



September 1, 2023 nü Secretariat Conference Hall nung Nagaland government spokesperson K G Kenye-i anir tangartemi osangbener den jembidang agiba noksa angur.

"Ajsüaka tanü senden nung adenba telok ajaki parnok tebilebatem lemsatopogo. Advocate General of Nagaland, KN Balgopal-ia legal tsütsü nungi item onük asem kanga junga rasaa shiogo" ta Kenye-i ashi. "UCC ajanga linük nung tamangba yimsü ajak liromedemnüer aser linük nung senso shia atema civil law ka

kümmür, saka iba ya Khristantem teimba ser aliba Nagaland ama state nung magizüker" ta pai metetdaksü.

Forest Conservation Act atema jembidang senden nung adenertemi Nagaland nung ali 95% tashi nübor meyong aser sorkar meyongbo 5% dang lir ta ashi.

"UCC aser FCA atema olemtepba sülen sorkar, kin teloktem aser civil societies külemi longjemer September 11 nungi tenzüksü aliba Assembly session nung UCC aser FCA magizüksü atema bangzüing ka renemtsü lemtet. Constitution nung Arlla (A) nung lateta aliba ama Naga nung nem temeten balaka agüja aliba nung ajemdaker iba Act ana magizüksü" ta Kenye-isa ashi.

2011 nung State Assembly-i

Petroleum and Natural Gas Rules & Regulation atema bangzüing ka renemtsü Centre sorkari Arlla 371A kübok Naga nung kumzüka aliba magizüksü asü koda ta osangbeneri asüingdangdang "iba mapang state sorkari 371A nung lateta aliba temetentem mamshitet" ta Kenye-i langzü.

"Saka tang Chief Minister Neiphiu Rio-i aniba sorkari Nagaland statehood angudang Centre sorkari temeten agütsüba amshitsü temulungtetba lir" ta paisa shisem.

"Tang Centre nung aliba lennirtemia Naga nung nem temeten balaka agüja aliba angatettsü imlar. Tesüiba state sorkartemi state Assembly nem Parliament nung agizükba ozüingtem agizüksü mesüra magizüksü asoshi special

powers agüja aliba amshitsü memerang" ta Kenye-isa metetdaksü.

March 28 nü Nagaland Assembly-i meyipa agiba Nagaland Municipal Act 2001 atema jembidang "sorkari Municipal Councils atema Act tasen ka yanglutsü" ta paisa ashi.

"Iba draft ya yangludar saka tanü bener maru kechiyong iba ya jungjunga shisadangdar aser Cabinet-ia reprangdangtsüla. Assembly session metenzükdang final draft renemtsü aser tanü senden nung tetsür nem shilem 33% agüja ULB elections agitsü mulungtepogo" ta Kenye-i ashi.

Municipal Act nung 'tax' ta aliba ojangtem agientsü aser 'fees' mesüra 'donation' agi melentsü kechiyong sen bendenbaji state senpongi masü saka ULBs ket nung dang ayutsü, ta paisa ashi.

Tesüiba nung ama masü kin hohotemi 33% women reservation indang final draft agizüksü imlar ta Kenye-isa shisem.

"Tanü senden nung tetsür nem shilem 33% lenzüksütsüba mulunga agizükogo aser ULBs nung chairperson's post madentsü lemtetogo" ta Printing & Stationeries and Prisons Advisor, Kropol Vitsu-ia ashi.

## Nagaland nung Agriculture Kisan Drone sayaogo

**Medziphema, September 1, 2023 (TYO):** September 1, 2023 nü Department of Agriculture-i Agriculture Kisan Drone sayaogo. Iba maparen ya Agriculture Director M. Ben Yanthan-i tenzüksü.

"Union Budget 2022-23 nung tongtipang osangtem rongnung Kisan Drones amshitsüba liasü. Iba ya crop assessment, digitization of land records, spraying of insecticides & nutrients atema amshitsü aser Ministry of Civil Aviation-i Drone Rules 2021 metetdaksüogo" ta Ben Yanthan-i ashi.

"Department of Agriculture-i iba technology tasen meteta alitsü atema Department Research Stations aser Farmers field nung Demonstrations agiogo" ta pai ashi.

Agriculture nung Drones amshitsü atema aluyimertemi drone technology alitettsüla. Iba atema SubMission Agricultural Mechanization (SMAM) aser Department of Agriculture

guidelines nung enoksemogo ta pai ashi.

"Financial Year 2022-23 nung SMAM Guideline indang Component-4 kübok drones 2 alitsü atema senotsü nguogo. Kisan Drone alitsü atema 40% Subsidized financial assistance angu aser Drone anaji Department indang tongtipang reju ana-SARS aser IETC nung ayutsü" ta Ben Yanthan-isa metetdaksü.

"Agriculture Drone ajanga aluyimertemi crop health, crop ratment, crop scouting, irrigation and carry out field soil analysis aser crop damage assessments maparen inyakteter" ta JDA SMAM Medovilie Ladu-i Dhaksha Agriculture drones indang osang lemsatopdang ashi.

Iba sentong nung Thangaraj Smart Dhaksha Unmanned System Pvt.Ltd Chennai India ajanga Kisan Drone amshiyim sayu, Addl. Director C. Peter Yanthan-i tesentepertem pelaa agizük aser Dy.DA SMAMPikato Jimo-i anküp tepela o jembia.

## Naga Hoho ketdangpur kümsük atsülanger

**Dimapur, September 1, 2023 (TYO):** August 31, 2023 nü Naga Hoho Presidential Council senden ka amendang telemtetba kar agiogo.

Hotel Saramati, Dimapur nung amenba senden nung Naga Hoho kümsük apuloktsütsü telemtetba agi.

Tanü tensa dak ajemdaker aser Yehzabo provisions Art. 8 Clause 4 nung aliba ama 2019-2023 kümsük atema tang teinyakdak Naga Hoho ketdangpurtem mapang ita 6 atsülangtsü aser ibaji Federal Assembly ajanga regularized

asütsü lemtet, ta Communication Cell, Naga Hoho sangdong ka nung ashi.

Senden nung Naga yimtenren olemtep indang onük benoka jembidang tekaratiba nung yimten latettsü asoshi Naga Hoho-i maneni yariteptsü lemtet ta Communication Cell-isa metetdaksü.

Maneni, 1st Federal Assembly bangzüing 6 nung aliba ama Naga yimten tekaratiba nung latettsü asoshi Committee On Naga Political Affairs (CONPA) tentetogo ta Naga Hoho sangdong nungsa shia lir.

## Mezüngbuba Nagaland Medical College nung kaketshir 100 aniokogo



September 1, 2023 nü Phriebagie, Kohima nung aliba NIMSR academic block nung Nagaland Medical College nung kaketshir mezüngbuba batch agiba noksa ka angur.

**Kohima, September 1, 2023 (TYO):** Nagaland nung mezüngbuba medical college-Nagaland Institute of Medical Sciences and Research (NIMSR) nung tanü medical students 100 aniokogo.

Phriebagie, Kohima nung aliba NIMSR academic block nung tanü kaketshirtem aniokba sentong ka ayongzüka agi.

Iba sentong nung Chief Secretary J. Alam-i o jembidang "iba ya academic session tenzüka dang masü saka Nagaland nung Medical College ka aginüba pungmang asangsang nung atalokba lir" ta ashi.

"Iba temelenshi aketba maparen ajanga Nagaland nung healthcare tarutsü lateta ayutsü" ta pai ashi.

Nagaland University nung

affiliated asüba NIMSR nem National Medical Commission (NMC)-i Letter of Permission agütsü. Academic year 2023-2024 nung MBBS seats 100 admission asütsü atema NMC-i taküm April ita temelaba agüja liasü.

"Iba ajanga Nagaland state ngur küm 60 sülen Medical College mezüngbuba lapoktsü lenmang lapoktsü" ta J Alam-i ashi.

"NIMSR lapokba aser batch tasen aniokba ajanga Nagaland nung healthcare wadang tajungba akümtsü. State sorkari technical aser infrastructure resources tajungtiba agütsütsü tenangzüka lir" ta paisa ashi.

Paisa kaketshirtem dang meranga azüingtsü aser nübor tenzüksü ayongzü.

Nagaland nung mezüngbuba

Medical College ya September 6 nü lapoktsü ta Chief Secretary-isa ashi.

"Takok anguba ya odang ataloker masü saka renemshiba, ajamaluba aser bendanga agütsüba ajanga dang angur" ta Health and Family Welfare Department Principal Director, Dr. Ritu Thurr-ia kaketshirtem pelaa agizükdang ashi.

"Meranga inyakba temelen kecha mali. Nai merangba ama tia takaba akümer" ta Dr Thurr-isa ashi.

"MBBS students mezüngbuba batch nung kaketshir 100 lir aser parnok rongnung Nagaland nungi 85 aser linük kübok tangalen nungi kaketshir 15 lir. Parnok dang faculty 45-i sayutsü" ta NIMSR Director cum Dean Dr. Soumya Chakraborty-ia ashi.



Aug 31 aonung Mokokchung Police o Mokokchung Press Club na mensem ka Mokokchung Addl. SP quarter nung akaba mapang tangokba noksa nung angur. Iba mensem nung Mokokchung Addl. S.P. Tumchobemo Yanthan, Mokokchung SDPO Tizhisie Pojar aser par külem officer-tem aser MPC nungi tongti zülur, Sashimeren-i anir par külem züngsemtemi shilem agia liasü. Iba mensem nung tongtibangsa Mokokchung district ajungketba maparen balala nung police o osangzülurtem teka amteper inyaksü shisa lemsatapa liasü. Mokokchung, 1st September, 2023.

### DC Dimapur-i nüburtem dang pei aliba tesem müreksü ayongzük

**Dimapur, Rongjui/September 01 (TYO):** District nung dengue tashidak tali akumba aser meyi mapang asüba yong sorkar offices/dokan/kilen ajak nung hopta nung khen (talisa Honibarnü) social work alitsü, ta Deputy Commissioner, Dimapur, Sachin Jaiswal, IAS ajanga sangdong ka nung ashi.

Merila poktetba tesem

samatsüsü nükjidong nung iba mera ya agir alitsü, ta ashi.

Anungji nisung ajaki pei aliba tesem aser temeket ajanga müreksü ajungshir aser iba mapang tzu atsüngdena aliba mesüdokba kisung masü saka naro pot, süngo tu, tyres, container tejen, refrigerator indang drip pan amala nungi tzu indoktsüla, kechiaser iba amala

nungi merila apoker, ta DC Dimapur sangdong ajanga ashi.

Maneni colony/ward/village chairman/GBs temia yariteptsü ayongzük aser nübur ajanga nem shilem agidakja kidang aser nüburtemi amshiba tesemtem nung tzu atsünga aliba indokba nung shilem agidaktsüsü ajungshir, ta sangdong ajangasa ashi.

### Jio Telecom Service tajungba mekümla tapet mera agitsü : AKM

**Mokokchung, Rongjui/September 01 (TYO):** Ao Kaketshir Mungdang (AKM) ajanga Mokokchung nung Jio Telecom Service nung tekolak Jio Piont Manager dangi tezüluba ka nung Mokokchung nung Jio Telecom Service kanga dang imejungi ita ishika arudagi,

anungji hopta ka tsüngda nung ya reprangshima inyakangta metetdaksüogo.

Jio Telecom Service network majungba ajanga nüburtem mapa aika meinyaketeter aser tongtepratep mesüetba den tongtipang rongtak nungtak mapa aika meinyaktettsüsa

akumer ta AKM-isa metetdaksüogo. Iba mapatong ya hopta ka tsüngda nung meinyakra AKM-i tapet mera agitsü ta Jio Telecom Service nem AKM tir Lanutoshi Aier aser tongti zülur Satemmongba tenati meyongnem agiba tezüluba nung metetdaksüogo.

### Department balala ketdangsürtem den tepila sentong agi

**Dimapur, Rongjui/September 01 (TYO):** Nagaland sorkar meyong department balala nung August 31, 2023 nü ketdangsürtem den tepila sentongtem agia liasü.

IT&C:

Director, Information Technology & Communication, Er. Tongtiliba Longkumer nem akhum agüja tepila sentong ka Department of Information Technology & Communication (DITC) indang Conference Hall nung August 31, 2023 nü agia liasü.

Iba sentong nung Advisor IT&C, H. Sethrongkyu Sangtam-i o tatsüka jembidang Er. Tongtiliba Longkumer-i bendanga agütsür department tenzükba atema tenüngsang agüja liasü.

Director menden nungi alusang Er. Tongtiliba Longkumer-ia department ketdangsür aser staff temi yimya shidak amshia mapa inyakba atema temolung asüba lemsatap aser maneni meranga inyaksü ayongzükka liasü.

Er. Chura Katiry-i Director menden nungi alusang indang service otsü kar bener arua jembidang pa lenisüba kübok IT policy of 2004, eProcurement Policy 2018, Telecom Policy 2019, aser eWaste Policy 2016 amala yangluba ashi. Iba den külemi pa mapang State Data Centre aser STPI amenokba indanga shia liasü.

Er. Tongtiliba Longkumer IT&C nung director inyakba mapang NPSC tatidang atema online application system, Scholarships single window system, State Portal, ILP, CMHIS e-Vigilance system aser sorkar department ajanga indang social media aser websites tem ka kumdaksüba indanga lemsatapa liasü.

Pa mapang Best Performing State in the Northeast Region in e-Governance nung CSI-Nihilent Award 2017, Northeast Tech Sabha - Enterprise Application Award by Indian Express Group 2018 anguba aser ano National e-Governance Service Delivery Assessment (NESDA) aser State Portal Accessibility categories among North Eastern and Hill States nung temaba jenjang tongtetba indanga ashi.

DoSE:

Directorate of School Education (DoSE) nungi anisüngzük anguba ketdangsür toku nem akhum agüja August 31, 2023 nü Morung Conference Hall, Directorate of School Education, Kohima nung tepila sentong ka agia liasü.

Iba sentong nung menden Assistant Director, Gloria Ezung liasü, kong Director, Wonthungo Tsopoe aser Additional Director, Razouseyi Vese natia anisüngzük anguba ketdangsür nem tenüngsang agüja jembidi.

DoSE nungi anisüngzük anguba ketdangsürtem ya Ratovinuo Pienyu, Joint Director; Nungshisongla Aier, Joint Director; M. Amongla Longkumer, Joint Director; Opangkokla Aier, Deputy Director; L. Moa Aier, Deputy Director; Kepemu James, Deputy Director; Y. Shahato, Assistant Director aser Vitsosielie Nagi, Head Driver nungertem alitsü.

H&FW:

Department of Health & Family Welfare (H&FW) ajanga Principal Director, Dr. Vibeitunuo M. Sachu aser Joint Director, Dr. Tiasunep Pongener na asoshi tepila sentong ka Brehostibarnü DHFW Lobby nung ayongzükka liasü, kong Commissioner & Secretary, H&FW, V. Kezo-i iba sentong moaja aden.

Iba sentong nung Principal Director aser Joint Director menden nungi anisüngzükba ketdangsür nem Kezo-i konang tetushi agüja liasü.

Iba sentong nung menden Director (Health), Dr. E. Motsuthung Patton liasü aser MD NHM aser Principal Director tasenba, Dr. Ritu Thurr-i tena nem kulizüng kakat tajung ka-ka agüja liasü.

Iba sentong nung Dr. Vibeitunuo M. Sachu aser Dr. Tiasunep Pongener natia department tenzükba mapang ajangshibatem lemsatapa liasü.

### Mokokchung DC-i nija gari kiburtem dang metetdaksür

**Dimapur, Rongjui/September 01 (TYO):** Deputy Commissioner, Mokokchung, Thsuvisie Poji-i September 1, 2023 nü sangdong ka nung 14th Nagaland Legislative Assembly Election, 2023 mapang office of the Deputy Commissioner & District Election Officer ajanga meshiba gari hire agütsüsü asoshi nija gari kiburtem dang metetdaksüogo.

Sangdong ajanga ashiba agi,

item taa ya September 4, 2023 nü nungi September 25, 2023 tashi agütsüsü. Anungji nija gari kibur temi office of the Deputy Commissioner & District Election Office nungi office lapoka aliba mapang anogo mashi nung arua meshitsü metetdaksüogo.

Item taa abeni aruba mapang driver/gari kibur temi 'requisition order' aser 'duty detailment slip' tem original bener arutsü metetdaksüogo.

### Advisor, Dr. Yhome-i Noklak semdang



Noklak nung district administration aser civil societies tem den senden ka amenba mapang Advisor, School Education & SCERT, Dr. Kekhrielhoulie Yhome-i o jembidang tangokba noksa nung angur.

**Dimapur, Rongjui/September 01 (TYO):** Advisor, School Education & SCERT, Dr. Kekhrielhoulie Yhome den School Education Department nungi ketdangsür temi August 31 nungi September 1, 2023 tashi Noklak sema jaja liasü.

Hokulbarnü Dr. Yhome-i Government Higher Secondary School Noklak semdang aser iba mapang GHSS Noklak ya Model School building-i belentsü nüngdak ta shia liasü, koba 2014 küm renemaka tazüng dang lir.

Pai Model School building tia reprangshim asü aser iba sülen ano SDEO Noklak aser Kasturba Gandhi Balaka Vidyalaya, Noklak indang office tem semdanga liasü.

August 31, 2023 nü Noklak Tourist Lodge nung district administration, CSOs, Khamniungan Students Union (KSU) aser school education department den sensaksemba mapang Thonoknyu nung EBRC tasen ka amenoktsü

atema asadangtsü, ta Dr. Yhome-i ashi.

Shisaliok tajungba kumdaksüsü mechi pai district administration, CSOs, nüburtem aser department külemi inyaksü ayongzükka liasü.

State nung education system tajungba akumtsü asoshi Department of School Education ajanga sentong tajung renema lir, ta Advisor, Dr. Yhome-i metetdaksü.

Pai Khamniungan kin dang Noklak district ya tajungba kuma yanglutsü asoshi ajaki yariteptsü ayongzükka liasü.

Dr. Yhome-i nüburtem dang government school tem nung tamang akatsü ayongzük, kechiaser tesayur tetemjen aliba den külemi text book, uniform aser midday meal angati agütsür, ta ashi.

Iba sentong nung Deputy Commissioner, Noklak, Arikumba, Joint Secretary, School Education Nagaland, Avelu Ruho aser Deputy Project Director NECTAR, Nagaland nungertem dena liasü.

### Mkg Police-i Brown Sugar (heroin) abener ka apu



**Mokokchung, Sept 1 (TYO):** Aug 31, 2023 nü Mokokchung Police-i Settsü lenjem nung mita ataba mapang, Tata Sumo gari ka (B/R No. NL 07 T 0693) nungi brown sugar (heroin) 10.55 grams bener lia apu. Iba dak sentakba nung Tuensang Officer Colony nung alir arishi küm 30 tain Mr. Trongdiba T. Sangtam (tebu tenüng - Thsalongse Sangtam, Yim - Chimonger, PO/PS Longkhim) pua lir. Iba brown sugar ya pa indang juli (waist bag) nung inoker liasü, ta Mokokchung Addl. SP & PRO-i sangdong ka nung metetdaksü.

## Opposition INDIA-i Coordination Committee ka tentetogo



September 01, 2023 nung Mumbai nung Opposition Indian National Developmental Inclusive Alliance (INDIA) teloktep nungi lenirtem tangokba noksa nung angur.

**Mumbai, September 01 (Agencies):** Sangküm Lok Sabha election nung Ato kilonser Narendra Modi aser BJP tamakok ngudaktsütsü nükjidong nung Hokolbarnü opposition teloktep INDIA-i züngsem 14-i akümba coordination committee ka tentetogo.

Taküm July ita nung opposition party 28-i taruba Lok Sabha election atema parnok longjemba metetdaksü aser iba teloktep nungja Indian National Developmental Inclusive Alliance (INDIA) sangdonga liasü.

Iba teloktep tentetba nükjidongji BJP nem vote magütsürtem indang votes ji opposition party tem tsüngda melemsatsü aser akokba tashi longjemer menden shia candidate kaka dang toktepdaktsütsü atema lir.

Hokolbarnü Mumbai nung ayongzükba senden nung opposition party temi Ato kilonser candidate mesüra common minimum programme mesangdong.

Hokolbarnü opposition party temi züngsem 14 aliba coordination committee ka tentetogo aser opposition teloktep nung telemteba agiba temaba tentetji iba committee ya asütsü.

Coordination committee züngsemtem rongnung nungji Nehru-Gandhi kibong nungi ka danga mali. Party tem tsüngda menden lemsatsü atema tekaraba nung committee-i inyaktsü.

September 30 tashi nungbo party tem tsüngda menden lemsatsü, ta osang angazüker.

Senden tembangba sülen osangbenertem den jembidang Congress lenir, Rahul Gandhi-i, iba senden nung adener lenirtemji India nungner nütsting shilem 60 ayimjemba lenirtem lir, anungji party 28 ya longjemra BJP-i takok mangutsü, ta metetdaksü.

Rahul Gandhi-isa, party tem tsüngda tangatetba balala lir, ajisüaka ibaji tang tashi nungbo liromedemogo, ta metetdaksü.

Osangbenertem den jembidang Shiv Sena Uddhav Thackeray telok nungi lenir, Aditya Thackeray-i, iba senden nung tongtibang telemteba ana agiogo- mezüngbuba nung,

tekeraba nung linük tesem balala nung lokti senden ayongzükba agitsü, aser tanabuba nung, 'Judega Bharat, Jeetega INDIA' omen nung ajemdaker INDIA teloktep nungi party temi communication & media asalentong atema amalitepa inyaktsü, ta metetdaksü.

Coordination committee nung züngsemtem rongnung NCP nungi Sharad Pawar, Congress nungi KC Venugopal, JMM nungi Hemant Soren, National Congress nungi Omar Abdullah, PDP nungi Mehbooba Mufti aser Shiv Sena-UBT nungi Sanjay Raut nungner densema lir.

Opposition alliance, Shiv Sena (UBT) tongti lenir, Uddhav Thackeray-i, "Anog shia INDIA teloktep tashi taitba dang kümдар. Opposition longjemba ajanga tanemertem tsübur," ta ashi.

Congress Tir, Mallikarjun Kharge-i, "Jenang maneni atuba aser mapa manguba tebilemsü anema raratsü atema onok kasa nükjidong lir," ta ashi.

Paisa, "Opposition longjemba ajanga Modi sorkar koda masür. Iba teloktep nung party ajaki mangyangba politics atema renema alitsüla," ta ashi.

Kharge-i, "Sorkari opposition party tem anema sorkar agencies amshitsü, anungji party ajaki renema alitsüla. Central Bureau of Investigation (CBI) aser Enforcement Directorate (ED) ama central agency aikati opposition party tem nungi lenirtem anema ken o benoka lir," ta ashi.

Kharge-i, "Tesüiba küm 9 tsüngda BJP aser RSS-i tesempa prokogo aser tangbo iba tejangji tanga tai maket train passenger tem aser school tanurtem anema inyaker," ta ashi.

Railway police constable kati train nung nisung khasetba aser Uttar Pradesh kübok Muzaffarnagar nung Hindu nungner tesayur kati kaketshir ka nem Muslim nungner kaketshir ka dak maadaksüba tatalokba dak sendakba nung Kharge-i iba o ya jemi.

"Ato kilonseri onük jembidang INDIA aitsüba dang masü saka asen linük nungja ya

kiralongrar telok ka den medemdangba aser alar temaitsüa atishia jembiba ajanga tamalen opposition senden ana takok anguba temaitsü sayur," ta Kharge-i ashi.

RJD tongti lenir, Lalu Prasad Yadav-i, opposition party tem melongjemba ajanga tesüiba küm aika linük nung nürburtem timtemogo," ta ashi.

"Modi sorkar kübok linük nung minorities kümzükba mali," ta paisa shisem.

## Centre sorkari ESIC hospital 30 nung chemotherapy service tenzükogo

**New Delhi, September 01 (Agencies):** Centre sorkari linük tesem balala nung ESIC hospital 30 nung chemotherapy services agütsüba maparen tenzükogo, ta sorkar ketdangsertem i sangdong ka ajanga metetdaksü.

Brihostibarnü New Delhi nung aliba ESIC headquarteres nung 191buba ESIC Corporation senden nung Labour & Employment Union Minister, Bhupender Yadav-i chemotherapy services tenzüktsüogo.

Chemotherapy services ajanga insure süa aliba sorkar mapa inyakertem aser parnok kibong züngsemtem cancer treatment melamela agitettsü, ta

Ministry of Labour & Employment-i sangdong ka nung metetdaksü.

Union Minister-isa control room ka semzüktsü. ESIC dashboards ji ajanga ESIC hospital tem nung nungdak balala repringtsü aser tang teinyakdak construction projects metetdaksütsü.

ESI Corporation senden nungji Minister-i ESIC hospital tasen 15, ESIC dispensaries 78 aser Beltola, Assam, ESIC Medical College & Hospital, K. K. Nagar, Chennai, Tamil Nadu aser ESIC Medical College & Hospital, Faridabad, Haryana nung aliba hospital tem nung yipten tali bendenloktsü atema agizükogo.

## USIEF-i Kolkata nung EducationUSA University Fair ayongzükba agiogo



**Kolkata, September 01 (Agencies):** Hokolbarnü Kolkata nung United States-India Educational Foundation (USIEF)-i U.S. Consulate, Kolkata den senteper EducationUSA University Fair ayongzükba agiogo, ta Public Diplomacy Section/U.S. Consulate General Kolkata nung Press & Media Communications Manager, Deepa Datta-i sangdong ka ajanga metetdaksü.

Temaba shisaliok atema United State nung azüngtsü jangraa maongka bushir kaketshirtem aser tsüraburtemi Kolkata nung aliba Hotel Hindustan International nung ayongzükba 2023 EducationUSA "Study in the U.S." University Fair nungji shilem agia aden.

Iba fair ajanga tejangrar kaketshirtem aser tsüraburtemi United States tesem balala nung accredited universities aser college 18 nungi ketdangsertem ajurutsü atema maongka angu.

United States nung bachelors, masters aser PhD programs agitsü jangrar kaketshirtemi shisaliok, kaketshirtem taküm aser senotsü teyari dak sendakba osangtem metetpelatsü atema

maongka ngua kaketshirtemi university balala nungi ketdangsertem dang tasüngdangba aika asüngdanga rajemogo.

New Delhi nungi Ambassador, Eric Garcetti-i, "India nungner kaketshirtem parnok nükjidong ataloktsü atema yaritsü maongka agütsübaji onoki pelaa agizüker. American Center nungi nenoki osang balala metetpelaba süaka, EducationUSA den application inyakyim teinyakdak süaka mesüra world-class instruction & facilities süaka nenoki ibaji U.S. campus nung angutsü. Nenok takok lenmang nung jajadang nenok nungita yaritsü atema United States-i melunga lir," ta metetdaksü.

Iba Fair nung adenertem U.S. higher education institutions nung program balala aser admission telatetba dak sendakba aika rajemogo. U.S. universities nungi ketdangsertem, EducationUSA advisers aser U.S. Consulate ketdangsertem den jembiba ajanga kaketshirtemi U.S. nung temaba shisaliok, U.S. student visa application inyakyim aser US nung lia azüngba dak sendakba osang aika rajemogo.

USIEF Executive Director, Adam Grotzky-i, "India nungner kaketshirtemi temaba shisaliok atema kanga sapuba linükji United States lir. Tesüiba küm aika USIEF nung EducationUSA-i US nung aliba reju balala nung azüngtsü jangrar kaketshirtem nungita yarir. Onoki kaketshirtem aser tsüraburtem dang iba maongka agia osang tejangja metetpelatsü mepishir," ta metetdakja liasü.

Iba Fair nung shilem agiba U.S. Universities ji- The George Washington University, Arizona State University, Illinois Institute of Technology, Iowa State University, Louisiana Tech University, Montclair State University, Old Dominion University, Syracuse University, New York University - Tandon School of Engineering, Northeastern University, University of Denver - Daniels College of Business, The University of Tulsa, USC Viterbi School of Engineering, University of Nebraska,

University of Massachusetts Lowell, University of Houston, University of Utah - David Eccles School of Business aser Washington State University liasü.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI02, 2023

### Manipur kodamasür !

**M**anipur nung Meitei nunger o Kuki nunger na tsüingda lendong ataloker joko anogo 120 süir saka tensa tajungba akümtsü atema center aser Manipur state nati kecha balaka süoki ia inyakba mangur. Pei lima nung pei nübertem rongnung kin o kin na tsüingda azütokshitepa raraba lendong nung, joko, nisung 200 jungnua asür aser meyirijang jungnua yirua lir. Iba denji pei ki toktsür jena aortem talidak maka nisung meyirijang tenem dak tali tesem balala nung jenoka lir. Iba ama tensa ka nung Manipur tatar senden minute terka mener senshiba jagi Manipur yimten aser lokti kodamasüba tia indang ashir. Shitakba agi, kodangsa pei lima nung nübertem rongnung iba ama lendong tulu atalokdir, jet ta tatar senden ayongzüka jembir, ruling aser opposition ta kecha mali, tatar ajaki yimjung yangluba nung shilem agi tenzüksüla. Ajisüaka, Manipur tensa yabo balaka, tatar 60 rongnung Kuki nunger tatar 10 bo tetsübu agi Imphal-i tatar senden nung adeni aotsüla masü aser parnok tsübubaji tasümaita agi masü saka tim dang, kechiyong kechi ataloktsüar memetet. Ano, tanüingba tatar 50 rongnungjia tang aliba Manipur state artsü meraksai longjema alitsü ken o süoka jembitsüla masü, kechiyong Naga nunger tatar ter jagi kechi ashitsüar memetet ta asüba kodamasü tensa tia kati Manipur iadokogo. Iba ama tensa tia ka nung anogo shia Miete nunger o Kuki nunger na rara manener aser tena tsüingda rara nokdang mali, government-a mali ama nübertem nem police station aser training center nungi prangpong injang rakzüka bener odaktsür ta Manipur lima ya tetsübutsü lima ka küma odagi. Aji oda, state nung police tashi mali aser yimsüsürtem tatar senden junga mementeter aser rarabo manener, ajisüaka Biren Singh-i aniba BJP government-bo odang odaktsür ta asüba center tebilembaji angatetsü kanga tasak kümogo. Aji oda, Manipur nung ozüing mamshiteti yimsüsürtem meyong kiojen dena rongdokja inyakba mapatem jagi BJP telok ajangzüksü na ? Iba yagi center government tebilemba ka atongtsüsa ali asü, koda ? Iba amajika masü nungbo aser Manipur nung aliba Miete aser Kuki nunger na pronglaji kasa India nunger senso tajungtema ta bilem nungbo, center government-i kasa BJP government süaka Manipur government-ji agientsüla aser President's Rule nung tensa tia azüoktsü merangtsüla. Aji oda, yimjung asoshi tapu aika bilemyonga, kodaser Meitei nunger ka Chief minister mena yur Meitei nunger o Kuki nunger na tsüingda yimjung ken o jembitetsü ? Atangji, Kuki nungertemi Meitei nungertem akoksatsüsa timtem agüja arur alitsüa akok, ibayongji Meitei nungertemi parnok dang kanga jashia inyakba mapatem reprangteter. Iba jagi Kuki nunger azüjang kata Imphal lenden nung melitetsüsa kümogo. Ajisüaka, ibaji Kuki nunger asoshi dang takoksa masü saka Meitei nunger asoshisa takoksa tuluba asütsü. Aji oda, Imphal lenden nung Kuki nunger maliba agi Imphal tilaba akümer amai nütsüing agia ajemtsü aser rongsen nunga ajemtsü aser shishilembabaren nunga talirtem aika ajema akümtsü. Ashiko, tang Manipur nung atalokba lendong ya ajungbena atalokba lendong ka masü saka nisung kari mapang agia sentong yanglur tenzüka lendong mapa ka asütsüa akok. Ashiko, iba mapa yagi Manipur lima merüktetsü ta bilema inyakba mapa ka asütsüa akok, saka iba sentong yagi Manipur lima merüktetsü asoshi mapang talangka agitsüsa nisung zü agi menenogo. Kasa lima aser kasa kin süaka, alima asünung kasa sensosangertem rongnung tagitsü raktepdang aiben mepelatep aser meputep adoker, ajisüaka tang Manipur nung atalokba amai kasa sensosanger agi tsükchirtem danga tamajungba kümer azü tokshia raraba yabo kenyongi meimlaba mapa ka lir. India nung iba amaisa kin o kin na aser tamangba yimsü o tamangba yimsü na government-i repanga lia makokertem meshimeshia samadaktsütsü aser takokertem alitsü ta asüba tangatetba aser nükjidong yur raratepdaktsür amai, government meyong prangpong injang dena amshia raratepdaktsüra, iba tongpang nungbo takokerbo shinga malitsü.

## OLEMSABANG

### Ao oshi zülo tamendakdak (foundation) nung yimsoshi (renaissance) putu

Talitemjen Imchen

Dr. Edward Winter Clark aser kinüngtsü Mrs Mary Mead Clark, tenati Aor nem zülotsü aser azüngtsü angazükdaktsütsü merangba ji, shisadagra tesüingmangtsü ka dang lir. Tenati Aortem sayutsü lenmang aisü nungi merangdang külen, tajongtiba ji Roman Zülojang (Roman Alphabet) nung Ao oshi sayuba ji asütsü ta nüklartet süti. Iba sülen Aortem-i zülotsü aser azüngtsü angazüka aindang ji, tena kodaka pelar alitsü.

Ano Aor kaketshir samanirtem azüing aser zülo nung wainshia meliaka, parnoki meranga jempi aser zülo yung tanü iba jenjang tongteta lir. Iba atema samanir ajak nem tenüingsang akütsür. Samanirtem ji, temetetba nungji molamoshia masü kanga telatet (limit) ka dang asünung, tanü Ao oshi yimsoshi putu nung Ao oshi zülo tamendakdak nükmen ya ken meyipa reprangshitsü tenüingdaktsü ta nibo bilemer. Talisa Ao oshi nung ojang (letter) ana C aser U nükmen jonga maliba lemsateper.

1.C: - Ao oshi nung C ojang (letter) ya shidak ka nunga amshiba olong ji mali. Article (English) meyipzükba nung ocet ta shibai bener aroar kanga jonger. Saka pa/lai iba o nungji dang C amshiashi tanüingba nungji keji formula amshiar mali. Ano shit (English) meyipzükba nung SÜ ta amshia aliba nung, shibai SCÜ ta C talila inokar temenünütsüka. Kodang C ji inoktir S ji indok nung CÜ ta kanga jonga adokla.

Iba den ji alia, tang tashi C amshiyim ojang ajak nungji C masü S ang amshiba angor. C amshiyim o (word) kar. Acen (Asen), Cemer (Semer), Cen (sen), Cenden (Senden), Cendok (Sendok), Censhi (Senshi), Centep (Sentep), Tacen (Tasen) amala (etc).

Ano tesasatsü ka ji J ojang (letter) amshiyim timba ka nung C ojang (letter) rakzüka amshiba angor. Tatishitsü aki: Chirong (Jirong), Chiyungtsü (Jiyungtsü), Kechi (Keji), Senchi/Cenchi (Senji) amala (etc).

2.U: - Ao oshi nung U ojang (letter) ya tajemtiba nung amshitsüsa tang tashibo oshi ji jempitar. Saka U ojang amshitsü nükmen jonga maliba aki jempidangbo tera nung dang, zülodangbo olong (meaning) aika nung züloba angor. U amshitsüsa adokba o (word) ji kar dang lir. Ayu, Lenyu, Ngoyu, Sayu, Süngyu, Yimyu, aser Yung. Yung o (word) nungji olong ishika sendakteter. Ayung, Ayungküm, Ayunglang, Ayungpang, Jiyung, Jiyungtsü, Yung, Yungkep Yungnet, Yungrep, Yungrok, Yungrü, Yungsen aser Yungtsü amala (etc).

Lano tain ajak asoshi tasak ka ji yimya süba aliba ka melenshitsüba ya asütsü. Asenokbo Ao oshi tanü tashi züloa aroba jenjang nungji yimya sübaa lir. Asenok yimya sübaa lir ji, asenok melenshitsü tasakar ta bilemer tanortem dang Ao oshi zülo tai sayutsü menüingdaker. Tsürabor mapangbo angazüktsüba ji kanga tongtipang liasü. Saka tanü putu nungbo zülo tamendakdak nükmen tai mesüra jonga mali ser tanor ka sayuba ji koda tesasatsüka.

Tanü Ao Oshi Zülo Tamendakdak (Foundation) Nung Yimsoshi (Renaissance) Putu mapang, Ao oshi nung ojang (letter) nükmen jonga malibatem ji meyangloshirapang, koda asütsü? "Nükmen nung aibelenra timjir" ta kentet nung jempiba ama asen mapang timtem akiyunga asen-isa Ao oshi nung ojang (letter) ajak ji nükmen jongjonga yanglor ayutsü aser sayutsü tenüingdaktsü ta bilemer.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Bradwell Elim Arogo nung tang mezüנג baptiba sentong agi



UK kübok Bradwell nung aliba Elim Pentecostal Arogo nung Rita baptitsü mapang anasa Pastor Anne aser Laurie na den tangokba noksa nung angur.

**September 01, 2023:** UK kübok Bradwell nung aliba Elim Pentecostal Arogo nung tang mezüנג baptiba sentong ayongzüka nisung asem tzi nung baptia Arogo nung züנגsemogo.

Baptiba sentongji swimming pool ka nung agi.

Arogoi baptiba sentong agitsü atema Phoenix Swimming pool 'hire' asü; August 13 nikonngang tang mezüנג Bradwell Elim Pentecostal Arogo nung baptiba sentong agi. Iba Arogo ya yaküm March ita nung ang tentetba lir.

Baptirtem rongnung tetsür

kabo mapang talangka nungi Khristan süaka baptitsü atema maongka mengui liasü. Baptir asempronglaji tetsürtem dang liasü.

Tetsür ana jagi Yarmouth nung aliba St George's Café nung Khrista agizükba sülen baptir.

St George's Café nungji angati chiyungtsü agütsür aser Khrista osangtajung lemsateper. Honibar aonung shia Arogoi iba Cafe nungji outreach sentong agir aser Khristantemi taküm kuli lemsateper.

Bradwell Elim Pentecostal Arogo nung Pastor Anne-i,

"Tang baptiba ya tetenzüker sür tarutsü nung baptiba sentong aika agitsü imlar, kechiyong iba tesem nung Tsüנגremi Pa temeim ajanga mapa inyaker," ta metetdaksü.

Swimming pool nung ayongzüka sentong tenzüka tekülem ken kar aten, iba sülen Pastor Anne-i Tsüנגremi o jemi aser Rita-i taküm kuli lemsatepa liasü.

Iba sülen baptitsüpurtem jagi Khrista dak tamang akaba lemsatepa baptiogo.

Iba sentong nungji Bradwell Elim Arogo nungi dang masü saka tanga denominations balala nungi züנגsemtema aden.

## Uttar Pradesh state nung Khristan pongubail nung chiokogo

**September 01, 2023:** Uttar Pradesh nung pastor ka den Khristan pezü anti-conversion ozüנג kübok tai tonglokja apuba sülen ita ana dak tema jail nung puoka liasü, ajisüaka parnok ajak bail nung chiokogo, ta osang ka ajanga metetdaksü.

August 30, 2023 nü Azamgarh district nung aliba court kati Pastor Poonam Bind den Khristan pezü- Sheel Bind, Vijay Bahadur, Sonvarsha aser Asha nunger nem bail agütsüogo, ta September 1 nü parnok atema ken o jembitsür, Ashish Kumar-i osangbener nem metetdaksü.

Par pongu ya June 29 nü apuba sülen tesüiba ita ana tashi jail nung liasü.

"Yimsü meyipdaksüba ken o nung tai tonglokja par pongu Azamgarh nung aliba jail nung ita ana liasü. Tangbo ni osang tejangja melemsateptetsü, kechiyong court tetuyuba repringtsüsa akümer," ta Kumar-isa metetdaksü.

Kumar-i, par pongu anema benoka aliba ken o metembang aser parnok anema maneni

bushisüנגang asütsü, ta metetdaksü.

Azamgarh nung sarasadem sentong ayongzüka agiba atema par pongu apu.

Iba district nung yimsü meyipdaksüba tatalokba ka dang mali, ajisüaka Khristantem anema inyakba manener, ta, Pastor Dinesh Kumar-i metetdaksü.

August 13 nüa kasa district kübok Sadatpur yimngak police-i anti conversion ozüנג kübok Khristan asem anema ken o benoka liasü. Nisung asem rongnung tetsü o jala na densema lir; asüנגdangyatsü atema police-i parnok pua lir, ta pastor-i metetdaksü.

Ano kidanger district Jaunpur nunga August 15 nü pastor asem densema Khristan pongu puogo; tamangba yimsü meyipdaksüba ken o nung tai tonglokja Rajjupur yimngak tetsür 19 densema Khristan 37 anema ken o benoka lir.

Kasa anogo nungjisa pastor asem den Khristantemji sub-divisional magistrate matsüנגdang anir aoba sülen

bail nung chiokogo.

Ano tanga tatalokba ka nung, Uttar Pradesh kübok Barabanki district nunga Protestant pastor ka den pa kinüngtsü aser par jabaso arrshi küm 3 tanur ka jail nung puoka lir.

July 31 nü police-i Pastor Harendra Singh aser pa kinüngtsü Priya Singh na apu.

New Delhi nung amenoka aliba United Christian Forum (UCF)-i, taküm January ita nungi June ita tashi nung Uttar Pradesh nung Khristantem anema inyakba tatalokba 155 lir, ta metetdaksü. January ita nungi June ita tashi nung India nung Khristantem anema inyakba tatalokba 400 dak tema lir, ta UCF-isa metetdaksüogo.

2020 küm November ita nung Uttar Pradesh nung BJP sorkari anti-conversion ozüנג tesashiba benokba sülen iba ozüנג kübok Khristantem nem tai tonglokja apuba tatalokba kanga bulua kümogo.

Nütsüנג million 200 aliba Uttar Pradesh state nung nütsüנג shilem 0.18 dang Khristantem lir.

## ANO GO ABEN TSÜNGREM DEN

### Tenem ka ama

T.Ken 125:1-5

"Yirusalem meketa tenem aliba ama, yamaji Kibuba pei nübur meketa lir, iba mapang nungi aser teti tatem maka" (t.2). Ken züluri kechi ashir ibaji angatetsü asoshi ali tema aser yangi aliba aika bushitsü menüנגdak. Ibai tanü asenok taküm nung mapa inyaktsü tayongzüka ka lir. Laishiba nung Tsüנגremji oset aika den medemdanga jemi. Tatishitsü, "Asen Tsüנגrem tarungba mi lir" (Ibri12:29). Mesüra, "Tsüנגrem asen jenokdak" (T.Ken 46:1). Yangi ken züluri Tsüנגremji Yirusalem meketa tenemtem aliba ama lir ta ashir. Ibaji Tsüנגrem aser Yihuda nüburtem asoshi yimti balaka liasü, aser asenok asoshia lir. Aser kodang ken züluri yimti meketa aliba tenemtemji repring, pai ashi, "Ibaji Tsüנגrem lenmang".

Tsüנגrem koda tenem mesük? Mezüנגbuba tenem kaji takang. Ken zülur tanir asüנגang pai tenemtemji ngua liasü. Kodang pa asangur aküm, item tenemtemji idakji odang liasü, aser item tenemtemji tanga idakji odang lir. Yamaji Tsüנגrem lir. Pa takang temulung lemstü. Pa memelenshir. Tsüנגrem yashi, tanü aser teti kasadang (Ibri13:8).

Tanabuba, tenem kati jenokdak agütsür. Tsüנגremi asenok awabanger aser anüker. Pa Zion tenem ama lir. Tekong ka nung ashir, "Kibuba dak shirnoki temulung alemer Zion tenem ama lir, koba arakzüksü makok, saka teti alir". Tsüנגremi naa tenem ka mesüka yanglutsütsü akok- takang aser tejenokdak kechiaser Pa ne jenokdak aser tashi lir.

Anungji asenoki pa dak amangtsüla. Shirnoki Kibuba dak amanger parnok tashi itta aser kümzüka alir. Parnok nüנגdak ajak akar. "O Kibuba, tajunger dang, aser shirnok pei mulungjang indang indanga ali parnok dang jungangma" (t.4).

Na tejenokdak nüנגdak dang Tsüנגremi Pa nübur Lemang balaka nung anebalur ta bilemtetang. Tsüנגremi pa nübur nem agütsüba tashi aser jenokdakji takang aser memelenshir. Pa amangang.

## Israel nung ketdangsertemi Khristantem teblemstü atema jemi

**September 01, 2023:** Israel nung ketdangsertemi anüdoklen Yirusalem yimti tejenba nung Khristantem reshikangshiba teblemstü atema o lemtepogo; iba senden ya Israel tourism ministry-i ayongzüka liasü.

Ketdangsertemi Yirusalem yimti tejenba nung tourism aser tawa Khristantem anema inyakba kanga bulua akümba atema o lemtepa liasü.

Iba senden nungji tourism, foreign affairs, interior aser justice ministries nungi ketdangsertem den police ketdangsertem aden.

Iba senden nung jembidang Tourism Minister, Haim Katz-i, "Israel-i senso ajak nem yimsü temeden aser külemstü temeden agütsür. Raliwalirtem anema inyakba mesüra Khristan yimsü dak sendakba temaitsütem raksatsüba ni aitsür," ta ashi.

"Iba ya aitsütsü tetemsü aser Yihuda nunger yimsü den mapet, kechiyong ozüנג tulutibaji- 'Nai ner kiyonger na ama meimang'

lir," ta paisa metetdaksü.

Taküm January 2 nü Yirusalem yimti tejenba anasa Khristantem leper raksaja liasü, iba sülen February ita nung Khristantem temeshi aini aoba lenmang 'Via Dolorosa' nung Yisu kürakyanglu ka raksaja liasü. Via Dolorosa ya Yisu Kangki nung angenloksü atema anir aoba lenmang lir, ta Khristantemi amanger.

Hombarnü amenba senden nungji Israel tourism ministry director-general, Danny Shahar-i, "Israel semdang raliwalir ajakji asen ambassador akümer, anungji parnok tajungtiba nung monger aotsüsa asenoki inyaktsüla," ta ashi.

"Sepaitemi longjemer amalitep nung ang asenoki ozüנג alema inyakba mapatem aser raliwalirtem anema inyakba nokdangtetsü," ta paisa ashi.

Yirusalem yimti tejenba nung Palestine nunger Khristantem aser Muslim nungertem anema inyakba kanga bulua kümogo.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Sabang**

- (v) longbang, atsübang (encircle)
- \* Sepaitemi tsükchir alidak tesem ajak sabang.

**Sabang**

- (n) mena kazütsü atema yangluba tesem ( platform)
- \* Akhi Aor ki kimabo sabang yangluasa ayu.

**OLONG PAITEP # 6623**

1				2				3		4
5		6								
							7			
8										
										9
		10				11				
				12				13		
14										
						15				
16										

**TIPLÉN**

- 2. Aou nung chiyungtsü asenba - (7)
- 5. Mangyima amongba - (5)
- 7. Tajemdakdak / Nükjidong - (4)
- 8. Pei dak malangba mapang - (7)
- 10. Juli - (7)
- 12. Sen ayudak - (7)
- 14. Ajitet - (4)
- 15. Tamajung aküm - (5)
- 16. Apuso - (7)

**LANGTSÜNGLEN**

- 1. Alu tekong ka - (7)
- 2. Ao-er kidong tenüng ka - (6)
- 3. Tashi manga - (6)
- 4. Te \_\_\_ g - (3)
- 6. Yimyim ayim - (3)
- 9. Tagitsü - (7)
- 10. Menungra bilem - (6)
- 11. Aiür - (6)
- 13. S \_\_\_ ar - (3)
- 14. Lemzük - (3)

**OLONG PAITEP # 6622 TELANGZÜBA**

**TIPLÉN:**

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

**LANGTSÜNGLEN:**

- 1. Tenükjang, 2. Luden,
- 3. Kiochtsü, 5. Lenti, 7. Tajangzük,
- 11. Teronem, 12. Sempa,
- 13. Jahaz.

**NAI-A YA METETTER MA**



C. V. Raman

I dagi India nung asür Wb. C. V. Raman noksa nung angur. Pai Asia nung mezüngbuba "Nobel Prize" (Physics) 1930 küm angu.

**I ba ongko ya inyakdangang**

+ + = 30  
 + + = 38  
 + + = 18  
 + x = ?

**Arunachal Dy. CM-i Anglo-Abor war memorial sayatsü**



**Itanagar, September 1, 2023 (Agencies):** Arunachal Pradesh nung tesüiba mapang taküm bendanga agütsür nem tetushi agüja Deputy Chief Minister Chowna Mein-i Kekar Monying Kebang yimtsü nung nüngshilung ka sayatsüogo.

Iba nüngshilung ya Battle of Kekar Monying bilemteta yanglu aser iba ajanga Anglo-Abor War 1911-12 nung shilem tulu agia liasü. Iba rara nung Adi nokinketertemi British sepaitem anema rara.

Iba nüngshilung ya Adi nunger, war heroes aser ita asem

tashi rara nung timtem ajurur ajak bilemteta yangluba lir.

"Rajiv Gandhi University (RGU) professor temi Anglo-Khamti, Anglo-Wancho aser Anglo-Abo Wars otsütem nungi taküm bendanga agütsür 220 indang otsü bushitetogo" ta Deputy CM Chowna Mein-i ashi.

77 buba Indian Independence Day nung Azadi ka Amrit Mahotsav tembangdang 'Meri Maati Mera Desh' campaign tenzükogo aser iba ya linük nung tasütaitertem nem tetushi agütsüba shilem ka lir, ta pai

ashi.

"Adi nungeri iba nüngshilung sayaba atema tenüngsang agütsür aser Unsung Heroes Committee-i maneni otsütem bushiteta metetdaksütsü" ta Mein-isa ashi.

Iba sentong nung Anglo-Abor War nung rarartem nungi jazükertem aden. Maneni MP Phangnon Konyak, MP Horen Singh Bey, MP Tapir Gao, state RWD Minister Honchun Ngamdang, MLA Biyuram Wahge aser MLA Ojing Tasing nungertem iba sentong nung aden.

**TIPRA Motha lennir Pradyot-i 'One Nation, One Election' pusemer**

**Agartala, September 1, 2023 (Agencies):** Tripura nung TIPRA Motha lennir Pradyot Debbarma-i "One Nation, One Election" pusemer ta metetdaksüogo.

"Prime Minister Narendra Modi-i ashiba ama ni One Nation, One Election pusema nungiter" ta Pradyot-i ashi.

"Elections ajak külemi agitsüla kechiyong kodangsa election agidir maparen ajak anendaka ayuba ni

ajangshiogo" ta pai ashi.

"Election nung vote kar angutsü atema scheme tem indang terenlok mapa anener. Küm 5 piyong election agiba ajanga asenoki asen den toktepertem den mejembir aser loktiliba nung aser talisa party züngsemtem tsüngda taku chitepba manener" ta Pradyot-isa metetdaksü.

"Asenok One Nation One Election lira senotsü aika kümzüksü" ta paisa shisem.

Centre sorkari 'One Nation, One Election' maparen atema taoba Tir Ram Nath Kovind-i aniba Committee ka tentetogo.

India nung "One Nation, One Election" ajanga Lok Sabha aser state assembly elections ajak külemi dang mapang ka nung agitsü nükjidong lir.

Anogo ka nung mesüra mapang telatet ka tsüngda elections agitsü atema Committee-i bilemer.

**Indian Army-i Assam police 2284 nem commando training agütsü**



**Guwahati, September 1, 2023 (Agencies):** Assam police commandos 2284 tashi Indian Army den training agiba tembangogo aser parnok pei pei battalion-i ogo.

Parnok rongnung women commandos 273 aser tetsür SI 15 dena sub-inspectors (SI) 268 lir.

"Indian Army ketdangsurtemi Assam aser Meghalaya kübok tesem tenet tashi nung parnok nem counter-insurgency operation indang training agütsü" ta

Defence spokesperson Lt Col Mahendra Rawat-i ashi.

Hopta 40 training nung adenba ajanga parnok tashi itshiogo, ta pai ashi.

Indian Army eastern command nung Gajraj Corps kübok iba training agi. Training tajung agiba commandos ya Assam police tongtoret ama asütsü.

"Assam Police Commando Battalion training takok ngua tembangba ajanga state police aser Indian Army tsüngda tesentaktep tajung

aliba sayur" ta Rawat-isa metetdaksü.

December 2, 2022 nung taoba Assam director general of police (DGP) Bhaskar Jyoti Mahanta aser taoba 4 Corps General Officer Commanding (GOC) Lieutenant General Dinesh Singh Rana nati Narangi Cantonment nung Assam police commando training tenzükja liasü.

1990s nungi Indian Army aser Assam police külemi yaritepa telungpurtem anema inyaka arur.

## Pskov airbase amakba ya Russia telung nungi lir: Kyiv

**Kyiv, Rongjui/September 01 (Agencies):** Mongulbarnü Russia nung Pskov yimti nung tayimtsü anendak drone amshia amakba ya Russia telung nungi yokba lir, ta Ukraine indang military intelligence tekolakbai ashi.

Ilyushin cargo plane ana samatsü aser ana raksatsü, ta Kyrylo Budanov-i ashi, saka Russia-ibo tayimtsü pezü samatsü ta ashir.

Budanov-ibo iba lendong ya Ukraine nung asü mesüra Russia nung inyakar mashi.

Ukraine indang drone amshia Russia amakba ya anogoshi amai ataloker. Aser parnoki Pskov amakba nangzükogo.

Ajisüaka iba yimti nungya long-range nok-nü amshia amak

südi ta temolung melemi aliba Budanov-i iba sangdong agütsüba ajanga tembanger.

Ukraine-i yangluba hadir kati kilometre 700 pilar aliba target ka nung kongshiogo, ta Ukraine Tir Volodymyr Zelensky-i Brehostibarnü shia liasü. Pskov ya Ukraine arütsü nungi kilometre 700 shi pilar lir.

"Onoki Russia indang litsü nungi inyaker," ta Budanov-i War Zone website dang Brehostibarnü ashi saka komala drones amshiar ajibo mashi.

Drones yagi tayimtsü indang 'tops' - totzü inokba aser wing spar indang tongtipang section - nung tenük yoker amak, ta pai ashi.

Raksatsür aliba tayimtsütem ya long-range cargo planes lir, koba meta talangi sepai aser

hadir belentsü tajung, anungji Russia asoshi jenjang aketba oset liasü.

Brehostibar aonung aser Hokulbar anepdanga Russia tesem balala nung drone amshia amakba lir.

Moscow tezülen Lyubertsy jila nung rockets atema electronic oset yangluba factory ka nunga amak ta osang kar ajanga ashir.

Ajisüaka Moscow Mayor Sergei Sobyenin-i pa indang Telegram channel nung Lyubertsy anasa drones tem khazüka yok aser iba mapang teraksatsüba mesüra nisung asü-amaba kecha mali ta ashi.

Hokulbarnep Moscow airport tem nungi aoba tayimtsü aika mapang atsülang mesüra thina liasü.

## Northwest Pakistan nung TTP telungpuri sepai 9 tepset

**Peshawar, Rongjui/September 01 (Agencies):** Pakistan northwest tsütsü Tehreek-e-Taliban Pakistan (TTP) teloki security forces convoy ka nung takum bendanga agütsür amakba lendong nung sepai toku asü aser pongu yiru, ta mitkar temi ashi.

Brehostibarnü Khyber Pakhtunkhwa province kübok Bannu district nung bomb pokloktsür ya bike ka nung mener arua convoy nung atsük, ta mitkartem indang media wing, Inter-Services Public Relations ajanga ashi.

Bomb bena alisangi pa indang bike ya convoy nung aliba gari ka nung atsük aser sepai toku asü aser pongu yiru, ta sangdong ajanga ashi.

Nokdanga aliba TTP ajanga iba lendong agütsüba nangzükogo.

Iba lendong atalokba sülen

ozüing amshirtem lendong atalokba tesemi arua tesem ajunga lungbang. Iba lendong agütsür aputsü asoshi search operation tuluka tenzükogo, ta ashi.

Taoba mapang Twitter ta ajaba social media platform X nung caretaker Prime Minister Anwaarul Haq Kakar-i iba mapa tamajung aija liasü. Iba ama mapa ya ajaki aitsütsüla aser yirur alirtem aser asür kinunger den asükhulemsateper, ta ashi.

Tawa Pakistan nung kiralongrar temi iba ama kiralongra mapa tamajung tali inyaker.

TTP ya 2007 küm telungpur telok balala ajanga tenteta liasü.

Pakistan nung anisüngzük makaba Khyber Pakhtunkhwa province kübok police checkpoint ka TTP telungpuri taoba ita amakdang police ana asü aser aika yiru.

January 30 nü Pakistan Taliban suicide bomber kati Peshawar nung aliba mosque ka nung nikongdang sarasadamba mapang pa dak alenoka aliba bomb pokdakja nisung 101 tepset aser 200 dak tema yirua liasü.

February ita TTP telungpur temi Karachi Police tekolakba indang office telungi aita khatepba mapang lendong agütsür asem aser police constable ana densema dangar pezü asü.

Iba telok ya al-Qaeda den tesendaktep tajung lir südi ta amanger aser 2009 küm army headquarters amakba, military bases amakba aser 2008 küm Islamabad nung aliba Marriott Hotel amakba densema lendong aika nung par tenüing asener.

TTP yagi 2014 kuma Peshawar nung Army Public School ka amakdang kaketshir 130 dak tema tepseta liasü.

## SÜR KÜM ASEM AJUNGBA ANOGO BILEMTETER

Asür Mrs. Kewele Imti Jamir  
Tasüba Anogo : 02.09.2020



Tanü anogo ya na onok nungi pilar küm asem abensar. Saka na iba lima nung meliaka, nai inyakba temeim mapatem bilemtetdang tanüa na onok den lir ama onok mulungjang aser shisatsü ajak anisüngzükdaksür.

~ Temeim Kinungbo, Jala-jabasotem, Semchirtem aser Anük-okutem.

## Johannesburg mi lendong nung asürtem bushi tenzükogo

**Johannesburg, Rongjui/September 01 (Agencies):** Johannesburg nung Brehostibarnü mi agi ki ka rondokba sülen South African firefighter tem asü-amartem reprangtsü asoshi ki telungi yiogo.

Nisung tali aliba aser tejen kumer aliba storey pongu ki ka nung kitsük-kirong lendong atalokba nung tanur 12 densema nisung 74 takum sama.

Nisung kata ki telung nung anüngzüka metoktsüner, ta ketdangsur temi ashir.

Mi ya kechi ajanga adokar tejanga memetet saka forensic investigator tem iba tesem tonga aruogo aser rondoker aliba jana kakteta bushitar.

Iba lendong nung sür alitsü südi ta bilema aliba kinungertem dang tasügang jangjatetsü asoshi tasügang yua aliba tesemi arutsü shiogo.

Tir Cyril Ramaphosa-i Brehostibar nikongdang Johannesburg tiyonglen iba

tesem semdangba mapang iba lendong ya yimti tiyonglen kisüjensüba tsütsü saksalemtsü ka lir, ta ashi.

Iba ki ya timtem balala ajurua aliba tetsürtem aser tanur tem asoshi amshia liasü, saka 'lease' tempangba sülen tashiyim agi rakzük, ta Tir Ramaphosa-i osangbener dang ashi.

Iba lendong atalokba anasa aliba ki o jen aika nung nisung alitsü metemsü kumogo.

Ajisüaka item ki tejen, kibur mesüra yimti ketdangsur temi yutsür aliba, sünga kibongtem alir aser aiben mapa tamajung inyakba telok nem sen agütsür.

Item ki nungya mejangjaba migrant tema alir, shirnok timba African linüktem nungi aruba lir.

Johannesburg yimti tiyong nung iba kitsük-kirong lendong ya Brehostibarnep 1:00 ako meta atalok aser yangji nisung 52 yirua liasü, ta Johannesburg Emergency Management Services (EMS) odongtar Robert Mulaudzi-i ashi.

## Thai chubai taoba PM Thaksin temerenshi ajemtsüogo

**Bangkok, Rongjui/September 01 (Agencies):** Thailand indang taoba ato kilonser Thaksin Shinawatra tepuokdak küm ti ayutsü obendang agüja aliba nung pai tatok agütsütsü mepishiba sülen Thailand chubai küm ka dang kuma ajemtsü.

King Maha Vajiralongkorn nungi tatok agütsüba ya official Royal Gazette-ia jangjatsü aser sangdong nung pa ato kilonser ama inyakba indang shia liasü.

"Thaksin-i mapa tamajung inyakba agizüker aser temolung shiranga jashiba sayuogo," ta sangdong ajanga Hokulbarnü ashi.

Pa taoba hopta private jet ka nung aru aser küm ti tepuokdak ayutsü asoshi yok. Tepuokdak mezüing aonung pa police hospital kati anir ao, kechiaser pa teku ashiba aser high blood pressure liasü.

Arishi küm 74 tain Thaksin

ya ato kilonser menden nung lia tim masüba nung tashi amshiba aser 'conflicts of interest' nung aija tepuokdak ayutsü aliba nungi jenshia bendang lima küm 15 lir meyipa shilang.

Thaksin ya ato kilonser ka liasü, aser pai linük aser nüburttem asoshi mapa tajung inyakogo, aser chuba yimli akhumtsüboa liasü, ta sangdong ajanga ashi.

"Pai inyakyim akhumtsüboa liasü, aibelenba nangzük, tatok meshi, court ajanga obendang agütsüba agizük. Tang pa tain kumogo, temang majung aser medical professional-i anepalutsü nüngdaker," ta chubar sangdong nung ashi.

"Tamarener chubai pa nem tatok agütsü aser Thaksin Shinawatra nem temerenshi agüja aliba ajemtsü ... anungji tarutsü nung linük yangertsü asoshi pai metetba aser ajangshibatam amshitsü."



Thaksin ya ato kilonser inyaktsü anaben shim aser 2006 nung mitkar temi tashiyim amshia atsüngdok.

Pa linüki meyipa shilangba anogo nung par Pheu Thai party ya mitkar bhukumba party tem den alliance yanglur sorkar tenteta liasü, anungji aikati pa tepuokdak ayutsüba mapang ajemtsü züngzüktepa liasü südi ta bilema liasü.

Taoba mapang telecoms tycoon aser Manchester City kibur Thaksin ya tanü Thai otsü

nung aikati nükshia repranger saka telemsa adokdaksür.

2000s tetenzüklen pa indang sentongtem mechi yimdak timsüing nung aliba Thai nung million aikati pa meimer, saka linük chuba yimli aser mitkar bukumer temi mapang talangka nungi mesakloki liasü.

Thai politics nung tesüiba küm 20 tsüngta mitkar temi Thaksin aser par allies tem yimden nungi atsüngdoktsü meranga aru.

Pa Bangkok atongba mapang pa bhukumer temi tushia agizük aser yimjak nung pai mezüing inyakbaji airport nung chuba indang noksa ka tsüngdang apudaka liasü.

Ghonda ishika lir Pheu Thai nungi Srettha Thavisin ya ato kilonser akum - koba 2014 küm mitkar temi Thaksin tenu Yingluck atsüngdokba sülen par party nung ato kilonser mezüingbuba akum.

2001 nungi Thai election ajak nung Thaksin den sendaktepa aliba party temi amokbanger aru saka taküm progressive Move Forward Party (MFP) ajanga menden timba angu.

Saka coalition sorkar tasenbai MFP ya atsüngdoka Thaksin aser Yingluck atsüngdokba mitkar lenirtem den sendaktepa aliba party tem aiok, anungji Thai nung aika mepelai akum.

"Ibai tamaren chuba indang taochi ajanga Thaksin dang temeim sayu," ta Thaksin indang okatsür Winyat Chatmontri-i ashi. "Thai nungeri iba ya agizüktsüla aser maitsütsüla, kechiaser iba ya royal power nung aibelenba ama züngshitsü," ta pai ashi.

Thailand nung chuba mezüingmeshiba asoshi ozüing tesashi lir aser iba yongji yimsüsür mezüingmeshiba atema tepuokdak küm 15 tashi ayur.

## MPL 2023 tembangba sentong IG Stadium nung agiogo



**Dimapur, Rongjui/September 01 (TYO):** Morning Premier League (MPL) 2023 shibangba sentong IG Stadium, Kohima nung meraketa September 1, 2023 nü agiogo. Iba MPL 2023 asayamung nung Morung United FC champion liasü.

Iba sentong nung tetushi tesemdanger ka ama Deputy Director of Youth Resource & Sports, Dovo dena liasü.

Iba asayamung tembangba sentong nung jembidang pai iba asayamung ayonger aser

asayar temi meranga inyakba ajanga iba football asayamung takok ngua tembangogo, ta ashi.

Iba asayamung omen 'Health and Friendship' nung ajemdaker maneni terenlok aser tajungba nung asayayonga aotsü imlaba Dovo-i lemsatepa liasü.

Department of Youth Resources & Sports ajanga yariba aser shilem agiba team ajaki saisapong yimya tajung amshiba atema MPL Convener Mele-i pelaba shia liasü.

Paisa iba asayamung

sponsor Lirunas, Symphony Café, Innovations Plus, Life Tents, Life Pro Productions, Disong Designs aser temolungertem dang pelaba lemsatepa liasü.

Iba sentong nung Miss Nagaland 2022, Hikali Achumi-i takok angurtem nem sempet agüja liasü.

Femina Miss India Nagaland 2018 Ruopfu Whiso lenisüba kübok iba sentong ya agia liasü, kong Hachobeno aser Chumreno nungeri K-pop dance ka agi shilem agia liasü.

## Mkg nung Nagaland State Level Volleyball Referee tatidang agitsü

**Mokokchung, Rongjui/September 01 (TYO):** Nagaland nung Volleyball asayatsü tsütsü lenla balala nung terenlok kadaktsütsü nükla nung Nagaland Volleyball Association aküm kübok Mokokchung District Volleyball Association (MDVA)-i 2023 Nagaland State Level Volleyball Referee tatidang September 12-15, 2023 anogotem nung yangi Mokokchung Multi-Sports Complex nung akatsü, ta MDVA sangdong ka ajanga metetdaksüogo.

Iba tatidang ya India nunger

volleyball asayatsü nung nüngtugu Dr. Harish Kumar Tiwari, certified FIVB Level - 1 Coach aser Ramesh Babu Vidyarthi, National Referee, Volleyball Federation of India (VFI) & All India Referee Examiner tena ketdangsüba nung agitsü. Iba tatidang ya Nagaland nung aliba lipuyimpur (indigenous inhabitant of Nagaland) -tem asoshi asütsü, ta metetdaksü.

Arishi küm 25 junger alirtem aser volleyball indang terabo metetertemi iba tatidang atema nung zülutsü akok. September

12, 2023 nü anepdang 10:00 ako nungi iba maparen tenzüka agitsü, anungji, iba anogo tejangrartemi item kuli kaketterm bener arutsüla; original Birth certificate, Pan Card aser Aadhar card.

Nisung shia registration fee senpak 3000/- agitsü. Iba tatidang dak sentakba nung nisung kari danga osang tejangja metetnura, MDVA President - 8132865806 mesüra Technical Committee Convenor - 9612938723 den tongteprateptsü akok, ta parnokisa metetdaksü.

## All Blacks teloki Khelo India Asmita Women's League kokogo

**Dimapur, Rongjui/September 01 (TYO):** Brehostibarnü Reema-i aniba All Blacks team-i JV Foundation Basket Court, Signal Angami, Dimapur nung Orca madak takok ngua Khelo India Asmita Women's League Dimapur Leg takok marok benogo.

Sempet agütsüba mapang Technical Director, Dimapur District Basketball Association, Tiameren Amri-i senpet aser kulizüing kaketer agüja liasü.

League matches round pongu asayaba sülen final nung All Blacks (Kohima) table temaba nung liasü aser iba sülen TMB (Kohima), Orca (Kohima) aser Elite B (Dimapur) ya 2nd, 3rd aser 4th nung tembang.

Semi-final mezüingbuba nung All Blacks (Kohima) ajanga Elite B (Dimapur) madak 16 - 6 agi akok. Iba asaya nung All Blacks nungi Reema-i points ter

nguteta liasü. Tanabuba semi-final nung Orca (Kohima) ajanga kanga junga asayateta TMB (Kohima) madak 16 - 12 agi akok. Iba asaya nung Orca nungi Kevi aser Achet nati points ti aser trok nguteta liasü.

Jenjang tasembuba asoshi TMB (Kohima) aser Elite B tsüngta kanga junga asayar TMB nungi Lele-i points trok nguteta Elite B madak 11-9 agi takok ngua liasü.

Final nung All Blacks ajanga tereprangertem temolung süa asayateta Orca madak 10-5 agi akok. Iba asaya nung All Blacks nungi Reema-i mejeta asayateta points pongu ngutet aser la nem Most Valuable Player (MVP) of the tournament senpet sen 2,000 agitsü.

Champions All Blacks yagi senpet sen 15,000 den kulizüing kaketer angu aser Runners Up Orca aser 2nd Runners-Up TMB nati senpet sen 7,500 aser

2,500 den kulizüing kaketer agizüka liasü.

Iba asayamung nung shilem agiba team ajak nem kulizüing kaketer agüja liasü.

Asayamung tembangba sentong nung Competition Manager Yudang Ao-i jembidang Khelo India, Sports Authority of India, Basketball Federation of India aser Nagaland Basketball Association dang pelaba lemsatepa liasü.

Asmita Women's League ya India nung tetsürtem rongnung saisapong temaba jenjangi ajungkettsü asoshi Khelo India kübok sentong ka lir.

Dimapur leg of 3x3 basketball tournament ya 50 cities programme nung shilem ka lir, koba Basketball Federation of India aser iba dak sendaka aliba associate members temi achayanga ayongzüker.

## 2023 MDFA Trophy October-i thinener

**Mokokchung, Rongjui/September 1 (TYO):** MDFA Trophy 2023 koba September 19, 2023 nungi asayatsüba sentong renemer liasü, ibaji October 17, 2023 nungi Nov 3, 2023 tashi asayatsü lemtetogo, ta Mokokchung District Football Association ketdangpuri club balala den football meimer aser tenungitertem ajak dang sasaba o sangdong ka ajanga metetdaksüogo.

Iba ya tongtibangsa Dr. T. Ao trophy ya mezüingbo October, 2023 nung agitsüba sentong renemer liasü, saka koda masüba maparen kar denjia sangküm February 2024 nung ang agitsü lemtetba ajanga MDFA sanen ludeni item ajakji asadanger küm shia MDFA ayonga aruba mapang

nung dang iba asayamung ayongtsü telemtetba agi, ta metetdaksü.

Tanabuba nung, asayartema timtem mekai asayatsü aser tereprangertema ayongayonga mener reprangtsü atema tsüingsang mongpu aser anema aliba (health) tsütsü item ajakji asadanger iba telemtetba ya agia liasü, ta parnokisa asayamung thinenba kuli metetdaksü.

Iba asayamung dak sentakba nung registration form aser club registration/renewal maparen atema tesüsabuba anogoji Sept 30, 2023 tashi alitsü. Anungji, tejangrartemi nungdakba form-temji 3 Kits Photo House, Alongmen Ward, Mokokchung Town nungi agizüka inyaktsü parnokisa metetdaksü.

## Al-Ittihad-i Salah atema sen million £150 agütsüba Liverpool-i magizük

**Liverpool, Rongjui/September 01 (Agencies):** Saudi Pro League nungi Al-Ittihad ajanga Mohamed Salah atema sen million £150 agütsüba Liverpool-i magizük.

Arishi küm 31 tain forward nung asayasang atema ya sen million £100 dang tali aser yangji ano danga kar inoksemer sen million £150 ajunger.

Saka Liverpool-i Egypt nungba ya ayoktsü atema masü ta tekong meranga nokdaker aser club asoshibo aji tatem ta ashir.

Salah ya Italy nung aliba Roma nungi 2017 küm Liverpool bushia aru aser taoba küm tiyonglen küm asem atema contract tasen ka zülutepa liasü.

Taoba hopta Liverpool manager Jurgen Klopp-i Salah ya Anfield asoshi noklang nung noklang shilem bendanga agütsür lir, ta ashi aser Hokulbarnüa pa ayoktsü atema masü ta club tangatetba lir, ta nenshia ashi.

"Jenjang kasa dang lir. Aser yangji temolung malemtsü kecha mali. Koma ali yamaji dang. Kecha ashitsü mali," ta Klopp-i shia liasü.

Premier League team tem asoshi transfer window ya Hokulbar aonung 11:00 ako (BST) nung shibangtsü lir, anungji Salah aotsü asoshi jembitsü Liverpool mapang ajema liasü.

Ajisüaka Al-Ittihad

atemabo asayar tasen anioktsü mapang lir, kechiaser Saudi Pro League transfer window ya September 7 nü shibangtsü.

Taoba mapang Salah agent temi Saudi Arabia aotsü asoshi mejembir ta shia liasü saka tang tesüsa Al-Ittihad dak sendakba nungbo telangzüba kecha magütsü.

"Mohamed ya Liverpool asoshi bendanga agütsür asayatsü temolungtetba lir," ta agent Ramy Abbas Issa-i August 7 nü social media post ka nung shia liasü.

"Taküm Liverpool yutsütsü bilema ali asübo, onoki taoba küm contract mezülushila."

Tan tenzüka season nung Liverpool asemen asaya aliba nung Salah tetenzük nungi asayaogo aser iba mapang Chelsea den draw asüba aser ano Bournemouth aser Newcastle United madak takok anguba ajanga Klopp'er telok points tenet ngua lir.

Salah-i Liverpool nungi asayadang par teloki Champions League, Premier League, FA Cup, League Cup, Fifa Club World Cup aser Uefa Super Cup nung takok nguteta lir.

Pai Premier League Golden Boot asemen aser PFA player of the year anaben nguteta lir.

Liverpool nungi midfielders Fabinho aser Jordan Henderson na Saudi Pro League indang Al-Ittihad aser Al-Ettifaq dangi ogo.

## BILEMDANGANG

"Shisa takatiba aser tamachitiba nati kodanga memelenshir."